



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu: Outubru 2011

Edisaun: 31 Outubru 2011

**Tribunál Distritál Suai kontinua hala'ó “Julgamentu Movél” haleu
distritu sira**

Iha loron Kuarta 20 Outubru 2011, Tribunál Distritál Suai (TDS), kontinua hala'ó julgamentu movél ba kazu krime ofensa ba integridade fízika simples, iha Distritu Maliana. Kazu ne'e rejistu ho númeru prosesu: 57/TDS/2011 ne'ebé nu'udar kazu krime ofensas integridade fízika simples hasoru nia konjuje.

Kazu refere komete husi arguidu ho inisiál JLS hasoru vítima AB. Kazu ne'e akontese iha Distritu Maliana iha loron 07 Marsu 2011. Julgamentu ne'e ho agenda atu rona deklarasaun husi arguidu no depoimentu husi vítima nian.

Prosesu julgamentu dirije husi Dra. Florença Freitas, nu'udar juiz singulár no Ministériu Públiku representa husi Dr. António Tavares da Silva no arguidu rasik hetan defeza husi Dr. Calisto Tout husi Eskritóriu Defensoria Públiku.

Diretór ezekutivu JSMP, Luis de Oliveira *haktuir katak inisiativa julgamentu movél ne'ebé halo husi Tribunál Distritál Suai ne'e nu'udar pasu ida ne'ebé pozitivu teb-tebes tanbá inisiativa ne'e nu'udar resposta konkreta ba dezafiu ne'ebé parte interasadu sira infrenta, tanbá la iha meus no kondisaun atu to'o rasik ba tribunál.*

Ita hein katak antes tribunál sira funsiona efetivu iha distritu sira hotu iha teritóriu laran tomak, julgamentu movél nu'udar mekanismu alternativu ida ne'ebé produtivu liu, atu hakbesik justisa ba públiku no enkoraza públiku atu utiliza setór justisa formál nu'udar

dalan ne'ebé kondisivu liu ba rezolusaun konfliktu sira ne'ebé akontese iha sira nia comunidade.

Tuir observasaun JSMP nian katak durante fulan Outubru 2011, aliende julgamentu movél iha Maliana, antes ne'e iha inisiu Outubru, hahu husi loron 4-7 Outubru 2011, Tribunál Distritál Suai mós hala'ó julgamentu movél hanesan iha Distritu Ainaro. Totál kazu ne'ebé julga iha Ainaro iha momentu ne'eba iha kazu 10, ne'ebé kompostu husi kazu violénsia doméstika 2, omosidiu agravadu 1, furtu agravadu 1, violénsia seksuál 1, roubu agravadu 1, abuzu konfiansa agravadu 1, ofensa fízika agravadu 2, no ofensa ba integridade fízika simples 1.

Bázeia ba monitorizasaun JSMP nian ba kazu ida ne'e katak durante prosesu julgamentu arguidu uza direítu la ko'alia ka nonook tuir artigu 60 (c) Kódigu Prosesu Penál.

Depoizde rona tiha deklarasaun husi arguidu no depoimentu husi vítima, prosesu julgamentu kontinua ho alegasaun finál.

Bázeia produsaun prova iha prosesu laran, Ministériu Públiku Ministeriu Públik konklui katak arguidu komete duni ofensa ba integridade fiziku simple ne'ebé realiza liu husi baku no tuku iha vítima nian matan parte loos, nomós tebe iha kidun dala rua no buti iha ibun.

Bázeia ba faktu hirak ne'e, Ministériu Públiku husu ba Tribunál atu fó pena prizaun tinan 3 sein pena suspensaun. Aliende ne'e kondena mós arguidu atu fó alimentasaun ba ninia oan sira ho valor osan 150 Dollar Amerikanu kada fulan.

Akuzasaun ne'e bázeia ba artigu 145 Kódigu Pénal konjuga ho artigu 35 Lei Nú. 7/2010 (*Lei Kontra Violénsia Doméstika*).

JSMP hein katak ho pazu ne'ebé Tribunál Distritál Suai hala'ó bele deminiu kazu pendente sira iha jurisdisaun refere no iha tempu hanesan bele hametin diak liu tan konfiansa públiku nian ba setór justisa.

Leitura sentensa sei hala'ó iha loron 27 Outubru 2011, tuku 14.30 Lokraik.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883/7295795